

四庫全書

史部

欽定四庫全書

史部

欽定續通志卷

六十五至
八十

主事臣尹壯圖覆勘

總校官原任侍講臣王燕緒

欽定四庫全書

欽定續通志卷七十五

后妃傳

宋

太祖母昭憲杜太后

太祖孝惠賀皇后

孝明王皇后

孝章宋皇后

太宗淑德尹皇后

懿德符皇后

明德李皇后

元德李皇后

真宗章懷潘皇后

章穆郭皇后

章獻明肅劉皇后

章懿李皇后

楊淑妃

沈貴妃

仁宗郭皇后

慈聖光獻曹皇后

張貴妃

苗貴妃

周貴妃

楊德妃

馮賢妃

太祖母昭憲杜太后定州安喜人也父爽贈太師后既

并歸於宣祖治家嚴毅有禮法生邕王光濟太祖太宗

秦王廷美

按廷美傳云母陳國夫人耿氏則非杜太后所生也與本傳異

夢王光贊燕

國陳國二長公主周德顯中太祖為定國軍節度使封

南陽郡太夫人及太祖自陳橋還京師人走報太后曰

點檢已作天子太后曰吾兒素有大志今果然太祖即

位尊為皇太后太祖拜於堂上衆皆賀太后愀然不樂

左右問故太后曰吾聞為君難天子置身兆庶之上若

治得其道則此位可尊苟或失馭求為匹夫不可得吾

所以憂也太祖再拜曰謹受教建隆二年太后不豫太祖侍藥餌不離左右疾亟召趙普入受遺命太后因問太祖曰汝知所以得天下乎太祖鳴噓不能對太后固問之太祖曰臣所以得天下者皆祖考及太后之積慶也太后曰不然正由周世宗使幼兒主天下耳使周氏有長君天下豈為汝有乎汝百歲後當傳位於汝弟四海至廣萬幾至衆能立長君社稷之福也太祖頓首泣曰敢不如教太后顧謂趙普曰爾同記吾言不可違也

命晉于榻前為約誓書於紙尾書臣普書藏之金匱命

謹密宮人掌之太后崩于滋德殿謚明憲葬安陵祔享

太廟乾德二年更謚昭憲合祔安陵

按本紀及禮志宣祖安陵在京城東

南隅乾德二年改葬河南府鞏縣西南故本傳兩言之

太祖孝惠賀皇后開封人右千牛衛率府率景思長女

性溫柔恭順動以禮法晉開運初宣祖為太祖聘焉周

顯德三年太祖為定國軍節度使封會稽郡夫人生秦

國晉國二公主魏王德昭五年薨建隆間追冊為皇后

葬安陵西北享于別廟神宗時與孝章淑德章懷並祔太廟

孝明王皇后邠州新平人彰德軍節度饒第三女孝惠崩聘為繼室封琅邪郡夫人太祖即位建隆元年八月冊為皇后常服寬衣佐御膳慈仁恭勤事杜太后得其驩心乾德元年崩葬安陵之北享于別廟太平興國二年祔享太廟

孝章宋皇后河南洛陽人左衛上將軍偓之長女孝明

后崩納入宮為皇后性柔順好禮太祖崩號開寶皇后
居西宮雍熙四年移居東宮至道元年崩祔葬永昌陵
北

太宗淑德尹皇后相州鄴人滁州刺史廷勛女太宗在
周時娶焉早薨及帝即位追冊為皇后加諡葬孝明陵
西北

懿德符皇后陳州宛丘人魏王彥卿第六女周顯德中
歸太宗建隆初封汝南郡夫人進封楚國夫人太宗封

晉王改越國開寶八年薨葬安陵西北帝即位追冊為

皇后享于別廟真宗即位詔有司議太宗配宰相請以

后配從之

按王偁東都事畧時宗正卿趙安易請以淑德配禮官以明德在萬安宮宜庶配位秘閣

校理吳淑以為皆未允因請以元德配詔謂禮宜酌于人情特以懿德升配所載甚詳附識于此

升祔

太廟

明德李皇后潞州上黨人潞州刺史處耘第二女開寶

中太祖為太宗聘為妃太平興國三年始入宮雍熙元

年十二月立為皇后后性恭謹莊肅撫育諸子及嬪御

甚厚真宗即位尊后為皇太后居西宮嘉慶殿咸平中

別建宮居之仍上宮名曰萬安

按真宗紀及東都事畧俱不言建宮移居事豈

以宮從舊名故從畧歟

景德元年崩祔葬永熙陵禮官請以懿德

明德同祔太宗廟室以先後為次從之

元德李皇后真定人乾州防禦使英之女太祖聞妃有容德為太宗聘之開寶中封隴西郡君太宗即位進夫人性恭肅有法度六宮推重之生楚王元佐及真宗太平興國二年薨真宗即位追封賢妃又進上尊號為皇

太后祔葬永熙陵享于別廟大中祥符三年禮官趙湘請以后祔太宗廟室真宗曰此重事也俟令禮官議之六年秋相王旦與羣臣表請后尊號中去太字升祔太廟明德之次從之

真宗章懷潘皇后大名人忠武軍節度美第八女真宗在韓邸太宗為聘之封莒國夫人端拱二年薨真宗即位追冊為皇后謚懷莊葬永昌陵側陵名保泰享于別廟舊制后諡冠以帝諡慶歷中禮官孝字連太祖諡德字

字連太宗諡遂改莊為章以連真宗諡云

章穆郭皇后大原人宣徽南院使守文第二女淳化四年真宗在襄邸太宗為聘之封魯國夫人進封秦國真宗嗣位立為皇后景德四年帝幸西京還以疾崩后謙約惠下性惡奢靡族屬入謁禁中服飾華侈必加戒勗有以家事求言于帝者后終不許兄子出嫁以貧欲祈恩賚但出裝具給之上尤加禮重及崩上深嗟悼諡曰莊穆葬永西陵西北享于別廟仁宗即位升祔真宗廟

室改諡章穆

章獻明肅劉皇后其先家太原後徙益州為華陽人虎捷都指揮使嘉州刺史通第二女也后在襁褓而孤鞠於外氏善播鼗蜀人龔美者以鍛銀為業攜之入京師后年十五入襄邸王乳母秦國夫人性嚴整因為太宗言之令王斥去王不得已置之王宮指使張耆家及即位入為美人以其無宗族乃更以美為兄弟改性劉大中祥符中為修儀進德妃自章穆崩真宗欲立為皇后

大臣多以為不可帝卒立之李宸妃生子后以為已
子與楊淑妃撫視甚至后性警悟曉書史聞朝廷事能
記其本末真宗退朝閱天下封奏多至中夜后皆預聞
宮闈事有問輒傳引故實以對天禧四年帝久疾事多
決於后宰相寇準密議奏請皇太子監國以謀泄罷相
用丁謂代之既而入內都知周懷政謀廢后殺謂復用
準以輔太子為楊崇勳所告懷政誅準貶衡州司馬

寇準

傳作道州司馬

於是詔皇太子開資善政堂引大臣天下事后

裁制於內真宗崩遺詔尊后為皇太后軍國重事權取處分謂等請太后御別殿太后不可於是請帝與太后五日一御承明殿帝位左太后位右垂簾決事議已定太后忽出手書第欲禁中閱章奏遇大事召對輔臣其謀出於丁謂非太后意也謂既敗馮拯等三上奏請如初議帝亦以為言於是始同御承明殿有司請制令稱吾以生日為長寧節出入御大安輦鳴鞭侍衛如乘輿今天下避太后父諱羣臣上尊號曰應元崇德仁壽慈

聖太后御文德殿受冊正旦郊祀帝率百官上壽范仲淹力言其非不聽明道二年帝親耕藉田太后亦謁太廟乘玉輅服禕衣九龍花釵冠齋于廟質明服袞衣減宗彝藻去劍冠儀天前後垂珠翠十梳薦獻七室上尊號曰應天齊聖顯功崇德慈仁保壽太后是歲崩諡曰莊獻明肅葬永定陵西北舊制皇后皆二諡稱制加四諡自后始初仁宗即位尚少太后稱制雖政出宮闈而號令嚴明恩威加天下左右近習亦少所假借宮掖

間未嘗妄改作賜族人御食必易以鈎器曰尚方器勿使入吾家也常服純繻練裙侍者見仁宗左右簪珥珍麗欲效之太后戒曰彼皇帝嬪御飾也汝安得學先是小臣方仲弓上書請依武后故事立劉氏廟而程琳亦獻武后臨朝圖后擲其書于地曰吾不作此負祖宗事

謹按通鑑輯覽

莊獻不嘗問魯宗道以武后何如主乎且欲立劉氏七

廟被天子乘冕皆何為者至進外家任宦者猶其過之小者耳獨於程琳之獻圖乃擲地詬之豈真乃心宋室蓋亦

知彼時勢尚有不能而已史臣遂有過舉之譏蓋必出於曾受其惠者之口

有漕臣劉綽者自

京西還言在庾有出贍糧千餘斛乞付三司后問曰卿
識王曾張知白呂夷簡魯宗道乎此四人豈因獻美餘
進哉后稱制凡十一年自仁宗即位乃諭輔臣曰皇帝
聽斷之暇宜詔儒臣講習經史以輔其德於是設幄崇
政殿之西廡而日命近臣侍講讀丁謂曹利用既以侮
權貶竄而天下惕然畏之晚稍進外家任內官羅崇勳
江德明等勢傾中外姻戚廝役拜官者數十人御史曹
修古楊偕郭勸段少連論奏太后悉逐之太后保護帝

既盡力而仁宗所以奉太后亦甚備帝春秋長猶不知
為宸妃所出終太后之事無毫髮間隙焉其後言者多
追詆太后時事帝曰此朕所不忍聞也下詔戒中外毋
復言於是泰寧軍節度使錢惟演請以章獻章慈與章
穆並祔真宗室詔三省與禮院議皆以為章穆皇后位
宗中壺已祔真宗室自協一帝一后之文章獻章懿宜
崇建新廟以奉慈為名同殿異室歲時薦享一用太廟
之儀慶歷五年禮院言章獻章懿二后請遵國朝懿德

明德元德三后同祔太宗廟室故事遷祔真宗廟序于章穆之次從之

章懿李皇后杭州人也父仁德終左班殿直初入宮侍章獻太后莊重寡言真宗以為司寢生仁宗封崇陽縣君進才人後為婉儀仁宗即位為順容從守永定陵章獻太后使劉美張德懷為訪其親屬得其弟用和補三班奉職初仁宗在襁褓章獻以為已子仁宗即位妃默處先朝嬪御中未嘗自異人畏太后亦無敢言者明道

元年疾革進位宸妃薨章獻太后欲以宮人禮治喪於外丞相呂夷簡奏禮宜從厚太后遽引帝起有頃獨坐簾下召夷簡詰問且怒曰相公欲離間吾母子耶夷簡從容對曰陛下不以劉氏為念臣不敢言尚念劉氏則喪禮宜從厚太后悟遽曰且奈何夷簡請治喪以一品禮殯洪福院夷簡又謂入內都知羅崇勳曰宸妃當以后服殮用水銀實棺異時勿謂夷簡未嘗道及崇勳如其言後章獻太后崩燕王為仁宗言

王鉉默記作章惠后語

陛下

乃李宸妃所生妃死以非命仁宗號慟哀毀不視朝累
日下哀痛之詔自責尊宸妃為皇太后諡莊懿幸洪福
寺祭告易梓宮親哭視之妃玉色如生冠服如皇太后
仁宗嘆曰人言其可信哉遇劉氏加厚陪葬永定陵廟
曰奉慈又即景靈宮建神御殿曰廣孝慶歷中改諡章
懿升祔太廟拜用和為彰信軍節度使檢校侍中

楊淑妃益州郫人祖瑫父知儼妃年十二入皇子宫真
宗即位拜才人又拜婕妤進婉儀帝東封西祀凡巡幸

皆從章獻太后為修儀妃位與之幾埒而妃通敏有智
思奉順章獻無所忤章獻親愛之故妃雖貴幸終不以
為已間後加淑妃真宗崩遺制以為皇太妃始仁宗在
乳褓章獻使妃護視且起居飲食必與俱所以擁佑扶
持恩意勤備及帝即位嘗召其姪永德見禁中欲授以
諸司副使妃辭曰小兒豈勝大恩小官可也更命為右
侍禁章獻遺誥尊為皇太后居宮中與皇帝同議軍國
事議者以帝春秋長習知天下情偽今始親政事不宜

沈貴妃宰相倫之孫父繼宗光祿少卿大中祥符初選
為才人歷美女婕妤充媛至德妃為人淑儉不華帝亦
以妃家世故待之異衆長秋虛位帝欲立之有從中沮
之者不果嘉祐末進貴妃熙寧九年薨諡昭靜

仁宗郭皇后其先應州金城人平盧軍節度使崇之孫
也天聖二年立為皇后初帝寵張美人欲以為后章獻
太后難之后既立而頗見疎其後尚美人楊美人俱幸
數與后忿爭一日尚氏于帝前有侵后語后不勝忿批

其頰帝自起救之誤批帝頸帝大怒入內都知閤文應
因與上謀廢后呂夷簡亦以前罷相怨后思傾之后遂
廢詔封為淨妃王京冲妙仙師賜名清晤居長樂宮于
是中丞孔道輔諫官御史范仲淹段少連等十人伏閣
言后無過不可廢俱被黜責

謹按通鑑輯覽

妻之于夫亦猶臣之于君子之于父耳妻批夫而無罪
臣批君子批父亦可不罪乎仁宗之失在于寵二美人
之與后忿爭既爭而相闕又失之自起相救耳然既已
及帝頸則罪在后矣即誤亦不可而况宮闈之秘所云
者出諸誰口然則臣之于君子之于父又可誤批乎仁
宗不能明正大義以抵其罪而顧謀之宦官謀之執政以

工議論紛然道輔仲淹反以
然而得名所為不益可笑哉

景祐元年出居瑤華宮而尚

美人亦廢于洞真宮入道楊美人別宅安置又賜后號

金庭教主冲靜元師後帝頗念之遣使存問賜以樂府

后和答之辭皆愴惋帝嘗密令召入后曰若再見召須

百官立班受冊方可屬小疾遣文應挾醫診視數日后

暴薨中外疑間文應進毒而不得其實帝深悼之追復

皇后而停諡冊祔廟之禮

慈聖光獻曹皇后真定人樞密使周武惠王彬之孫也

明道二年郭后廢詔聘入宮景祐元年九月冊為皇后
性慈儉重稼穡帝于禁苑種穀親蠶善飛白書慶厯

八年閏正月帝將以望夕再張燈后諫止後三日衛卒

數人

續通鑑作
顏秀等

作亂夜越屋叩寢殿帝聞變欲出后閉

閣擁持趣呼都知王守忠使引兵入衛后度賊必縱火

陰遣人挈水踵其後果舉炬焚簾水隨滅之是夕所遣

宦侍后皆親剪其髮諭之曰明日行賞用是為驗故爭

盡死力賊即禽滅

謹按通鑑輯覽

御批觀此所載仁宗曾一后之不如直是無丈夫氣但所云剪髮微賞豈能盡識其人黜者將自剪髮以邀功且不數月而以張美人為扈蹕功更謂賊本起皇后閣以前後相形而論則紀事之不實多誣概可知矣張妃怙

寵上僭欲假后蓋出游帝使自來請后與之無靳色妃喜還以告帝曰國家文物儀章上下有秩汝張之而出外廷不汝置妃不懌而輟英宗方四歲育禁中后拊鞠周盡迨入為嗣子贊策居多帝夜暴疾崩后悉斂諸門鑰召皇子入及明宰臣韓琦等至奉英宗即位尊后為皇太后帝感疾請權同處分軍國事御內東門小殿聽

政大臣日奏事有疑未決者則曰公輩更議之未嘗出
已意頗涉經史多援以決事祝曹氏及左右臣僕名分
不以假借宮省肅然明年夏帝疾益愈即命撤簾還政
神宗立尊為太皇太后名宮曰慶壽帝致極誠孝所以
承迎娛悅無所不盡后亦慈愛天子外家男子舊毋得
入謁后春秋高后弟佾亦老帝數言宜使入見輒不許
他日佾侍帝帝復為請乃許之因偕詣后閤少焉帝先
起若令佾得伸親親意后遽曰此非汝所當得留趣遣

出元豐二年崩初王安石當國變亂舊章后乘間語神宗謂祖宗法度不宜輕改吾聞民間甚苦青苗助役宜罷之安石誠有才學然怨之者甚衆帝欲愛惜保全之不若暫出之于外帝悚聽垂欲止復為安石所持遂不果帝嘗有意于燕薊已與大臣定議乃詣慶壽宮白其事
后曰儲蓄賜予備乎鎧仗士卒精乎帝曰固已辦之矣后曰事體至大吉凶悔吝生乎動得之不過南面受賀而已萬一不諧則生靈所係未易以言苟可取之太

祖太宗收復久矣何待今日帝曰敢不受教蘇軾以詩得罪下御史獄人以為必死后遼豫中間之謂帝曰嘗憶仁宗以制科得軾兄弟喜曰吾為子孫得兩宰相今聞軾以作詩繫獄得非仇人中傷之乎摺至于詩其過微矣吾疾勢已篤不可以寬濫致傷中和宜熟察之帝涕泣軾由此得免及崩帝哀慕毀瘠有司上諡葬于永昭陵

張貴妃河南永安人父堯封為石州推官卒妻錢氏納

妃于章惠皇后宮寢長得幸有盛寵妃巧慧多智數善承迎勢動中外慶歷元年封清河郡君遷修媛忽被疾曰妾姿薄不勝寵名願為美人許之皇祐初進貴妃後五年薨仁宗深悼之追冊為皇后諡溫成

苗貴妃開封人父繼宗母許先為仁宗乳保妃以容德入侍生唐王昕福康公主封仁壽郡君拜才人昭容德妃英宗育于禁中妃擁佑頗有恩既踐祚酬其前勞進貴妃元祐六年薨諡曰昭節

周貴妃開封人生四歲從其姑入宮張貴妃育為女稍
長得侍仁宗生兩公主帝崩妃日一蔬食屏處一室誦
佛書晝夜不解衣者四十年連進至賢妃徽宗立加貴
妃歷五朝勤約一致年九十三薨諡昭淑

楊德妃定陶人天聖中以章獻太后姻連選為御侍封
原武郡君進美人端麗機敏妙音律組紉書藝一過目
如素習父忠為禁侍仁宗欲加獎擢辭曰外官當積勞
以取貴今以恩澤徵倖恐啓左右諛謁之端帝悅命徙

居肅儀殿積與郭后不相能后既廢妃亦遣出後復召為婕妤歷修媛修儀熙寧五年薨贈德妃

馮賢妃東平人以良家女九歲入宮及長得侍仁宗生邢國魯國二公主封始平郡君帝將登其品秩力辭不拜養女林美人得幸神宗生二王而沒王尚幼妃保育如已子累加才人婕妤修容在禁掖幾六十年始終五朝動循禮度薨年七十七贈賢妃

欽定續通志卷七十五

欽定四庫全書

欽定續通志卷七十六

后妃傳六

宋二

英宗宣仁聖烈高皇后 神宗欽聖憲肅向皇后

欽成朱皇后 欽慈陳皇后

林賢妃 武賢妃

哲宗昭慈孟皇后 昭懷劉皇后

徽宗憲恭王皇后

顯肅鄭皇后

顯仁韋皇后

王貴妃

喬貴妃

劉貴妃

劉安妃

欽宗仁懷朱皇后

英宗宣仁聖烈高皇后亳州蒙城人曾祖瓊祖繼勲皆

有勲王室母曹氏慈聖光獻后

原文作妃按曹后未嘗為妃應是后字之訛謹

改正姊也后少鞠宮中時英宗亦在帝所與后年同既長

遂成昏濮邨生神宗岐王顯嘉王頽壽康公主嘉祐八

年

按高繼勳傳云嘉祐八年子遵甫女正位皇后李靈長編載嘉祐八年四月英宗即位立皇后高氏原文

誤作治平二年今改正

冊為皇后

謹按通鑑輯覽

御批

爾時所謂諸正人者不嘗斥賈昌朝交通女謁乎而此所立皇后高氏之母固曾太后之姊也為文通為不文通

且力贊濮王子入繼又何以對昌朝哉

后第殿內崇班士林供奉久帝欲遷

其官后謝曰士林獲升朝藉分量已過宣宜援先后家

比神宗立尊為皇太后居寶慈宮帝累欲為高氏營大

第后不許久之斥望春門外隙地以賜營繕費悉出寶

慈不調大農一錢元豐八年帝不豫浸劇宰執王珪等

入問疾乞立延安郡王為皇太子太后權同聽政帝領之珪等見太后簾下后泣撫王曰兒孝順自官家服藥未嘗去左右書佛經以祈福喜學書已誦論語七卷絕不好弄乃令王出簾外見珪等珪等再拜謝且賀是日降制立為皇太子初岐嘉二王日問起居至是令母輒入又陰敕中人梁惟簡妻製十歲兒黃袍懷以來為倉

卒備

謹按通鑑輯覽

御批中人內侍安得有妻且十歲兒袍宮中豈不能製史家不過欲頌太后撫幼帝之美而不覺其言之過甚而謬矣

哲宗嗣位尊為太皇太后驛召司馬光呂公著迎問今日設施所宜先未及條上已散遣修京城役夫減皇城覘卒止禁庭工技廢導洛司出近侍尤亡狀者戒中外毋苛歛寬民間保戶馬事由中旨王珪等弗預知又起文彥博遣使勞諸途諭以復祖宗法度為先務且令亟疏可用者從父遵裕坐西征失律抵罪蔡確欲獻諛以固位乞復其官后曰遵裕靈武之役塗炭百萬先帝中夜得報起環榻行徹旦不能寐自是驚悸馴至大故遵

裕得免刑誅幸矣何故顧私恩而違天下公議確悚慄而止光公著至並命為相使同心輔政凡熙寧以來政事弗便者次第罷之於是以常平舊式改青苗以嘉祐差役參募役除市易之法逋茶鹽之禁舉邊砦不毛之地以賜西戎而宇內復安契丹主戒其臣下勿復生事於疆場曰南朝盡行仁宗之政矣元祐三年廷試舉人有司請循天聖故事帝后皆御殿后止之又請受冊寶於文德后曰母后當陽非國家美事况天子正衙豈所

當御就崇政足矣上元燈晏后母當入觀止之但令賜之燈燭遂歲以為常姪公繪公紀當轉觀察使力遏之臨政九年中外綏定力行故事抑絕外家私恩文思院奉上之物無問巨細終身不取人以為女中堯舜元祐八年崩葬永厚陵後章惇蔡卞邢恕始造為不根之謗皇太后太妃力辨其誣事乃已至高宗時昭暴惇卞恕罪褒錄后家

神宗欽聖憲肅向皇后河內人故宰相敏中曾孫也治

平三年歸于潁邸封安國夫人神宗即位立為皇后帝不豫后贊宣仁后定建儲之議哲宗立尊為皇太后宣仁命葺慶壽故宮以居后后辭曰姑居西而婦處東瀆上下之分不敢徙遂以慶壽後殿為隆慶宮居之帝將卜后及諸王納婦后敕向族勿以女真選中族黨有欲援他族例求遷秩者后曰吾族未省用此例何庸以私情撓公法一不與哲宗崩獨決策迎端王章惇不能沮徽宗立請權同處分軍國事后以長君辭帝泣拜移時

乃聽凡紹聖元符以還惇所斥逐賢大夫士稍稍收用之故事如御正殿避家諱立誕節之類皆不用聞賓召故老寬徭息兵愛民崇儉之舉則喜見於色甫六月即還政明年正月崩葬永裕陵

欽成朱皇后開封人父崔傑早世母李更嫁朱士安后鞠於所親任氏熙寧初入宮為御侍進才人婕妤生哲宗及蔡王似徐國公主累進德妃哲宗即位尊為皇太妃時宣仁欽聖二太后皆居尊故稱號未極元祐三年

宣仁詔春秋之義母以子貴其尋繹故實務致優隆於是與蓋仗衛冠服悉侔皇后紹聖中欽聖復命即閤建殿改乘車為輿出入由宣德東門百官上殿稱殿下名所居為聖瑞宮

東都事畧作瑞聖宮

徽宗立奉禮尤謹崇寧元年

薨追冊為皇后上尊諡陪葬永裕陵

欽慈陳皇后開封人幼穎悟莊重選入掖庭為御侍生徽宗進美人帝崩守陵殿思顧舊恩毀瘠骨立左右進粥藥揮使去曰得早侍先帝願足矣未幾薨建中靖國

元年追冊為皇太后上尊謚陪葬永裕陵

林賢妃南劔人幼選入宮既長遂得幸封永嘉郡君升美人
生燕王侯越王德邢國公主進婕妤元祐五年薨
詔用一品禮葬贈貴儀又贈賢妃

武賢妃始以選入宮元豐五年進才人生吳王佖賢和
公主歷美人婕妤徽宗即位進昭儀賢妃大觀元年薨
謚曰惠穆

哲宗昭慈聖獻孟皇后涪州人眉州防禦使馬軍都虞

候贈太尉元之孫女也初哲宗既長宣仁高太后歷選世家女百餘入宮后年十六宣仁及欽聖向太后皆愛之教以女儀元祐七年諭宰執孟氏子能執婦禮宜正位中官命學士草制又以近世禮儀簡畧詔翰林臺諫給舍與禮官議冊后六禮以進帝親御文德殿冊為皇后宣仁太后語帝曰得賢內助非細事也久之劉婕妤有寵紹聖三年后朝景靈宮訖事就坐諸嬪御立侍劉獨背立簾下后閣中陳迎兒呵之不顧閣中皆忿冬至

日會朝欽聖太后於隆祐宮后御坐朱髹金飾嬬好在
他坐有愠色從者為易坐製與后等衆弗能平因傳唱
曰皇太后出后起立劉亦起尋各復其所或已撤嬬好
坐遂仆于地懟不復朝泣訴于帝會后女福慶公主疾
后有姊頗知醫嘗已后危疾以故出入禁掖公主藥弗
效持道家治病符水入治后驚曰姊寧知宮中禁嚴與
外間異耶令左右藏之俟帝至具言其故藝符于帝前
宮禁相傳厭魅之端作矣未幾后養母聽宣夫人燕氏

尼法端與供奉官王堅為后禱祠事聞詔入內押班梁從政管當御藥院蘇珪即皇城司鞠之獄成命侍御史董敦逸覆錄罪人過庭下氣息僅屬無一人能出聲者敦逸秉筆疑未下內侍郝隨等以言脅之乃以奏牘上詔廢后出居瑤華宮號華陽教主王清妙靜仙師法名冲真初章惇誣宣仁后有廢立計以后逮事宣仁惇又陰附劉賢妃欲請建為后遂與郝隨構成是獄天下冤之久帝亦悔曰章惇誤我元符末欽聖太后詔后還

內號元祐皇后崇寧初郝隨諷蔡京再廢后徽宗從之

詔依紹聖詔旨復居瑤華宮加賜希微元通知和妙靜

仙師靖康初瑤華宮火徙居延寧宮又火出居相國寺

前之私第

按東都事畧及文獻通考俱云靖康之難六宮北去后以廢居瑤華宮獨留不載徙居延

寧出居私第事與本傳異

金人圍汴欽宗與近臣議再復后尊為元

祐太后詔未下京城陷時六宮中有位號者皆北遷后

以廢獨存張邦昌僭位尊為宋太后迎居延福宮用胡

舜陟馬伸言復工尊號元祐皇后迎入禁中垂簾聽政

后聞康王在濟遣尚書左右丞馮解李回及兄子忠厚持書奉迎王至南京即皇帝位改元后以是日撤簾尊為元祐太后尚書省言元字犯后祖名請易以所居宮名遂稱隆祐太后將幸揚州命郭仲荀衛太后先行駐揚州州治尋詔忠厚奉太后幸杭州以苗傅為扈從統制踰年傅與劉正彥作亂請太后聽政又請立皇子太后力拒之帝聞事急詔禪位元子太后垂簾聽政朱勝非請令臣僚得獨對論機事仍日引傅黨一人上殿以

釋其疑太后從之每見傅等曲加慰撫傅等皆喜韓世忠妻梁氏在傳軍中勝非以計脫之太后召見勉令世忠速來以清巖陞梁氏馳入世忠軍諭太后意世忠等遂引兵至逆黨懼朱勝非等誘以復辟命王世修草狀進呈太后喜曰吾責塞矣再以手札趣帝還宮即欲撤簾帝令勝非請太后一出御殿乃命撤簾是日上皇太后尊號帝幸建康

按高宗紀建炎三年五月帝至江寧政府名建康原文誤作建寧今改正

命僉書樞密院事鄭穀衛太后繼發比至帝率羣臣迎

于郊會防秋迫命劉寧止制置江浙衛太后往洪州百
司非預軍事者悉從仍命滕康劉珪權知三省樞密院
事從行凡四方奏讞吏部差注舉辟功賞之類皆隸焉
復命四廂都指揮使楊惟忠將兵萬人衛從帝慮敵人
來侵密諭康珪緩急取太后旨便宜以行既至洪州金
人自大冶縣掩至康珪奉太后行次吉州金人追急太
后乘舟夜行質明至太和縣舟人景信反楊惟忠兵潰
康珪俱遁兵衛不滿百遂往虔州帝命中書舍人李正

民來朝謁時土豪陳新率衆圍城康珏惟忠弗能禁惟

忠步將胡友自外引兵

高宗紀作叛將胡友亦犯虔州

破新于城下新

乃去帝聞罷康珏命盧益李回代之遂遣御營司都統

辛企宗帶御器械潘永思迎歸太后至越帝親迎于行

宮門外遍問所過守臣治狀太后生辰治酒宮中從容

謂帝曰宣仁太后之賢古今母后未有其比昔奸臣肆

為謗誣雖嘗下詔明辨而國史尚未刪定豈足傳信吾

意在天之靈不無望于帝也帝聞之悚然後迺更修神

宗哲宗實錄始得其正而奸臣情狀益著紹興元年

原文

誤作五年今依高宗紀改正

崩于行宮之西殿帝詔曰朕以繼體之

重當從重服凡喪祭用母后臨朝禮謚曰昭慈獻烈皇

太后殯于會稽上皇村祔神主于哲室位在昭懷劉皇

后上三年改謚昭慈聖獻后性節儉謹有司月供千

緡而止詔文書應奏者勿避后父名羣臣請上太皇太

后號亦不許戒敕忠厚等不得預聞朝政通貴近至私

第謁見宰執初后受冊日宣仁太后歎曰斯人賢淑惜

福薄耳異日國有事變必此人當之後皆如所云

謹按通鑑

輯覽

御批史家紀宣仁之言以為孟后前後廢立及隆祐播遷張
本夫異日之事宣仁非有神術先知何以識其然哉且宣
仁若果先識其然則世家女百餘人中豈無一福德兼全
者而必用此福薄之人
以成異日之禍何為哉

昭懷劉皇后初為御侍明豔冠後庭且多材藝由美人
嬖好進賢妃有盛寵能順意奉兩宮時孟后位中宮后
不循列妾禮孟后既廢后竟代焉徽宗立冊為元符皇
后明年尊為太后名宮崇恩帝緣哲宗故曲加恩禮后

以是頗干預外事且以不謹聞帝與輔臣議將廢之而
后已為左右所逼即簾鉤自縊而崩

徽宗顯恭王皇后開封人德州刺史藻之女元符二年
歸于端邸封順國夫人及即位冊為皇后生欽宗及崇
國公主后性恭儉鄭王二妃方亢寵后待之均平大觀

二年崩謚曰靖和葬永裕陵之次四年改謚惠恭

改謚
事本

傳失載今依
徽宗紀補

紹興中始祔徽宗廟室改上今謚云

顯肅鄭皇后開封人也父紳為直省官以后貴封太師

樂平郡王后本欽聖殿押班徽宗為端王每日朝慈德
宮欽聖命鄭王二押班供侍及即位遂以二人賜之后
入宮好觀書章奏能自製崇寧初封賢妃遷貴妃有異
寵徽宗多賚以詞章天下歌之王皇后崩立為皇后將
受冊有司創製冠服后請命工改製妃時舊冠又乞罷
黃麾伏小駕鹵簿等儀從之恩澤皆弗陳請時族子居
中在樞府后奏外戚不當預國政必欲用之且令充外
職帝為罷之后性端謹善順承帝意欽宗受禪封為太

上皇后遷居寧德宮稱寧德太后從上皇幸南京金師退先歸欽宗出郊迎后于是兩宮歡甚洽汴京破從上皇幸青城北遷留五年崩于五國城紹興七年何薜等使還始知上皇及后崩高宗大慟詔立主成服祔主徽宗室梓宮歸入境承之以槨納輦衣其中與徽宗合攢于會稽永祐陵

顯仁韋皇后開封人高宗母也初入宮為御侍崇寧末封平昌郡君大觀初進嬖好累遷婉容高宗在康邸出

使進封龍德宮賢妃從上皇北遷建炎改元遙尊為宣
和皇后封其父安道為郡王由是遣使不絕紹興十年
遙尊為皇太后上冊寶于慈寧殿是後生辰至朔皆遙
行賀禮洪皓在燕求得后書遣李徽持歸高宗大喜曰
遣使百輩不如一書遂加徽官金人遣蕭毅邢具瞻來
議和高宗語之曰太后果還自當謹守誓約因命何鑄
曹勛報謝召至內殿諭之鑄等至金首以后歸為言再
三懇請金主許之十二年二月至臨安入居慈寧宮先

是以梓宮未還詔中外輟樂至是慶太后壽節始用樂
太后聰明有智慮初金人許還三梓宮太后恐其反覆
呼役者畢集然後起攢時方暑金人憚行太后慮有他
變乃陽稱疾須秋進發已而稱貸于金使得黃金三千
兩以犒其衆由是途中無間言太后還宮謂兩宮給使
宜令通用不然則有彼我之分而佞人間言易以入也
時皇后未立太后屢言之高宗請降手書太后曰我但
知家事外庭非所當預將行冊命承平典禮悉能記之

二十九年崩于慈寧宮攢于永祐陵之西祔主太廟徽宗室太后性節儉有司進金唾壺太后易令用塗金宮中賜予不過三數千所得供進財帛多積于庫至是喪葬之費皆仰給焉

王貴妃與鄭后俱為押班徽宗立封平昌郡君進位至貴妃生郕王楷莘王植陳王機惠淑康淑順德柔福冲懿帝姬政和七年薨謚曰懿肅

喬貴妃初與高宗母韋后俱侍鄭皇后約先貴者母相

忘既而貴妃得幸徽宗遂引韋后二人愈相得二帝北
遷貴妃與韋后俱至是韋后將還貴妃舉酒酌韋后曰
姊善重保護歸即為皇太后妹無還期終死于朔漠矣
遂大恔以別

劉貴妃其出單微入宮即大幸由才人七遷至貴妃生
濟陽郡王棧祈王模信王榛政和三年薨先是妃手植
芭蕉于庭曰是物長吾不及見矣已而果然帝深悼之
特加四謚曰明達懿文又欲踵溫成追崇故事使皇后

表請因冊贈為后而以明達謚焉

劉安妃本酒保家女初事崇恩宮宮罷出居宦者何訢
家內侍楊戩譽其美復召入遂有寵為才人進至淑妃
生建安郡王模嘉國公椅英國公櫨和福帝姬政和四
年加貴妃妃天資警悟解迎意合旨雅善塗飾每製一
服外間即倣之林靈素以技進目為九華玉真安妃肖
其像于神霄帝君之左宣和三年薨初謚明節和文旋
用明達近比加冊贈為皇后葬其園之西北隅帝悼之

甚後宮皆往唁帝相與啜泣崔妃獨左視無戚容帝悲
怒疑其為厭蠱遂廢崔妃為庶人崔生漢王椿及帝姬
五人云

欽宗仁懷朱皇后開封祥符人父伯材武康軍節度
使欽宗在東宮徽宗臨軒備禮冊為皇太子妃欽宗即
位立為皇后從帝北遷不知崩聞慶元三年

寧宗紀
作四年上

尊號祔太廟欽宗室

欽定續通志卷七十六

欽定四庫全書

欽定續通志卷七十七

后妃傳七

宋三

高宗憲節邢皇后

憲聖慈烈吳皇后

潘賢妃

張賢妃

劉貴妃

劉婉儀

張貴妃

孝宗成穆郭皇后

成恭夏皇后

成肅謝皇后

蔡貴妃

李賢妃

光宗慈懿李皇后

黃貴妃

寧宗恭淑韓皇后

恭聖仁烈楊皇后

理宗謝皇后

度宗全皇后

楊淑妃

高宗憲節邢皇后開封祥符人父煥朝請郎高宗居康
邸以婦聘之封嘉國夫人金兵犯京師從三宮北遷上

皇遣曹勛歸脫所御金環使內侍持付勛曰幸為吾白
大王願如此環得早相見也王憐之及即位遙冊為皇
后紹興九年崩於五國城金人祕之高宗虛中宮以待
者十六年顯仁太后回鑾始得崩聞諡懿節祔主於別
廟紹興十二年八月后梓宮至攢於聖獻太后梓宮之
西北淳熙末改諡憲節祔高宗廟

憲聖慈烈吳皇后開封人父近以后貴累官武翼郎后
年十四歲高宗為康王被選入宮王即帝位后常以戎

服侍左右后頗知書從幸四明衛士謀為變又問帝所
在后紹之以免未幾帝航海有魚躍入御舟后曰此周
人白魚之祥也帝大悅后益博習書史又善翰墨由是
寵遇日至與張氏並為婉儀尋進貴妃紹興十三年詔
立為皇后顯仁太后性嚴肅后身承起居順適其意嘗
繪古列女圖置座右為鑑又取詩序之義扁其堂曰賢
志初伯琮以宗子召入宮命張氏育之后時為才人亦
請得育一子於是得伯玖更名璩張氏卒併育於后后

視之無間伯琮性恭儉喜讀書帝與后皆愛之封普安郡王后嘗語帝曰普安其天日之表也帝意決立為皇子出璩居紹興高宗內禪手詔后稱太上皇后遷居德壽宮孝宗即位上尊號曰壽聖太上皇后乾道七年加號壽聖明慈淳熙二年復加壽聖齊明廣慈之號十二年加尊號曰備德上皇崩遺詔改稱皇太后帝欲迎還大內太后以上皇几筵在德壽宮不忍舍去因名所御殿曰慈福居焉光宗即位更號壽聖皇太后以壽皇故

不稱太皇太后也嘗言及用人曰宜崇尚舊臣紹興四年加尊號曰隆慈備福孝宗崩始正太皇太后之號時光宗疾未平不能執喪宰臣請垂簾主喪事后代行祭奠禮尋用樞密趙汝愚請於梓宮前垂簾宣光宗手詔立皇子嘉王為皇帝翌日撤簾慶元元年加號光祐遷居重華宮三年崩遺詔太上皇帝疾未痊瘡宜於宮中承重皇帝服齊衰五月以日易月詔服期年喪諡曰憲聖慈烈攢祔於永思陵

潘賢妃開封人元懿太子母也父永壽直翰醫局官高
宗居康邸時納之邢后北遷妃未有位號帝即位將立
為后吕好問諫止之立為賢妃太子薨從隆祐太后於
江西踰年還紹興十八年薨

張賢妃開封人建炎初為才人有寵進婕妤帝欲擇宗
室子養禁中輔臣問帝以宮中可付託者帝曰已得之
矣已而伯琮入宮年尚幼帝因命婕妤母之是為孝宗
尋遷婉儀十二年卒贈賢妃

劉貴妃臨安人入宮為紅霞帔遷才人累遷婕妤婉容

紹興二十四年進賢妃

高宗紀
作貴妃

頗恃寵驕侈嘗因盛夏

以水晶飾脚踏帝見之命取為枕妃懼撤去之淳熙十

四年薨

劉婉儀初入宮封宜春郡夫人尋進才人與劉婉容俱

被寵進婉儀頗恃恩招權嘗遣人諷廣州番禺獻明珠

香藥許以爵官金人將改盟劉錡主戰幸醫王繼先從

中沮之因謀誅錡帝不懌一日婉儀見帝有憂色陰訪

得其言以寬帝意帝怪與繼先言合詰之婉儀急具以實對帝大怒託以他過廢之

張貴妃開封祥符人初入宮封永嘉郡夫人乾道六年進婉容淳熙中封太上皇淑妃進貴妃紹熙元年薨美人馮氏才人韓氏吳氏李氏王氏俱被寵後皆廢吳氏中宮近屬也紹興三十年復故封李氏王氏俱明艷上皇愛之及崩憲聖后見二才人每感憤孝宗即追告命許自便蓋非常制云

孝宗成穆郭皇后開封祥符人奉直大夫直卿之女孫
其六世祖為章穆皇后外家孝宗為普安郡王時納焉
封咸寧郡夫人生光宗及莊文太子愔魏惠憲王愷邵
悼肅王恪紹興二十六年薨追封淑國夫人三十一年
用明堂恩賜福國夫人既建太子追封皇太子妃及受
禪追冊為皇后謚恭懷尋改安穆及營阜陵又改成穆
祔孝宗廟父城累官昭慶軍承宣使

成恭夏皇后袁州宜春人曾祖令吉為吉水簿夏氏初

入宮為憲聖太后閤中侍御普安郡王夫人郭氏薨太
后以夏氏賜王封齊安郡夫人即位進賢妃踰年奉上
皇命立為皇后乾道三年崩謚安恭寧宗時改謚成恭
初后之生也父協奇之及長以姿納宮中久之父居益
困及歸客裘之僧舍號夏翁翁亡后始貴訪得其弟執
中補承信郎執中與其微時妻至京宮人諷使出之擇
配貴族執中弗為動他日后親為言執中誦宋弘語以
對頗工書復善騎射嘗為館伴副使連射皆中金人駭

服孝宗聞其才將召用之謝曰他日無累陛下保全足
矣人以此益賢之

成肅謝皇后丹陽人幼孤鞠於翟氏因冒姓焉及長被
選入宮憲聖太后以賜普安郡王封咸安郡夫人王即
位進婉容踰年進貴妃成恭皇后崩中宮虛位淳熙三
年妃侍帝過德壽宮上皇諭以立后意尋遣張去為傳
旨立貴妃為皇后復姓謝氏光宗受禪上尊號壽成皇
后孝宗崩尊為皇太后慶元初加號惠慈嘉泰二年加

慈佑太皇太后開禧三年崩

按寧宗紀開禧三年五月太皇太后謝氏崩本傳脫

開禧二字蒙上作嘉泰三年今增入

諡成肅攢附於永阜陵后性儉慈減

膳羊每食必先以進御服澣濯衣有數年不易者弟淵

以后貴授武翼郎后嘗戒之曰主上化行恭儉吾亦躬

服澣濯爾宜崇謙抑遠驕侈後歷遷至保信軍節度使

封和國公

蔡貴妃初入宮為紅霞帔封和義郡夫人進婉容淳熙

十年拜貴妃十二年薨父滂宜春觀察使

李賢妃初入宮為典字轉通義郡夫人進婕妤淳熙十年卒贈賢妃

光宗慈懿李皇后安陽人慶遠軍節度使贈太尉道之中女道帥湖北聞道士皇甫坦善相人出諸女拜坦坦見后曰此女當母天下言於高宗遂聘為恭王妃封榮國夫人進定國乾道四年生嘉王七年立為皇太子妃性妬悍嘗訴太子左右於高孝二宮高宗不憚謂吳后曰是婦將種吾為皇甫坦所誤孝宗亦屢訓后宜以皇

太后為法不然行當廢汝后疑其說出於太后及太子
即位冊為皇后光宗欲誅宦者近習皆懼遂謀離間三
宮會帝得心疾孝宗購良藥欲因帝至宮授之宦者誣
訴於后后心銜之頃之內宴后請立嘉王為太子孝宗
不許后曰妾六禮所聘嘉王妾親生也何為不可孝宗
大怒后退持嘉王泣訴於帝謂壽皇有廢立意帝惑之
遂不朝上皇黃貴妃有寵因帝親郊宿齋宮后殺之以
暴卒聞是夕風雨大作黃壇燭盡滅不能成禮帝疾由

是益劇不視朝政事多決於后

謹按通鑑輯覽

御批光宗政事多決於后視唐高宗令后決百司奏事何異
至斷臂擅殺之慘亦復相同然李后之毒悍實皆光宗闇
懦不振有以釀成之而不朝壽
皇失子道其罪更浮於高宗矣
后益驕奢封三代為王家

廟逾制衛兵多於太廟推恩親屬下至李氏門客亦奏
補官是時帝久不朝上皇中外疑駭紹熙四年九月重
明節宰執侍從臺諫連章請帝過宮給事中謝深甫切
諫帝感悟趣命駕朝重華宮百官列俟帝出至御屏后
挽帝入曰天寒官家且飲酒百僚侍衛相顧莫敢言中

書舍人陳傳良引帝裾請毋入因至屏後后叱退之遂

傳旨罷過宮

謹按通鑑輯覽

御

批晨昏定省天性自然固非作而致之者至於侍從連章力諫臺臣慟哭殿庭即勉強往朝而本心已不可問矣乃甫趣駕欲行旋以李后挽留即止忽而感悟天良忽而漸滅殆盡光宗既非失心狂易之疾何昧於父子之親受制悍后恬不知恥此誠成丘蒙所云天下殆哉岌岌乎之時矣

寧宗即位尊后曰太上皇

后上尊號曰壽仁慶元六年崩

黃貴妃淳熙末在德壽宮封和義郡夫人光宗為皇太

子傍無侍姬上皇以夫人賜之遂專寵即位拜貴妃紹

熙二年為皇后李氏所殺又有張貴妃亦舊侍東宮次
婕妤符氏後出嫁於民間

寧宗恭淑韓皇后相州人其六世祖為忠獻王琦初后
與姊俱被選入宮后能順適兩宮意遂歸平陽郡邸封
新安郡夫人進崇國王受禪冊為皇后后父同卿由知
泰州升揚州觀察使慶元六年崩諡恭淑同卿累遷慶
遠軍節度使同卿季父侂冑聲勢熏灼同卿每懼滿盈
不敢干政同卿沒一年而后崩侂冑竟敗人始服其善

遠權勢云

恭聖仁烈楊皇后少以姿容選入宮忘其姓氏或云會

稽人

按周密齊東野語云后養母張於儀真長蘆寺前
僦居主僧善相知其女當實假之資如杭入慈福

宮寧宗至后所必目之
因以為賜語異本傳

慶元元年封平樂郡夫人進婕

妤有楊次山者亦會稽人后自謂其兄也遂姓楊氏五

年進婉儀六年進貴妃恭淑皇后崩中宮未有所屬后

與曹美人俱有寵韓侂冑見后任權術而曹美人性柔

順勸帝立曹而后頗涉書史知古今性復機警帝竟立

之次山客王夢龍知其謀密以告后后深銜之與次山欲因事誅侂冑會侂冑議用兵中原俾皇子曦入奏侂冑再啓兵端將不利於社稷帝不答后從傍贊之甚力亦不答恐事泄俾次山擇廷臣可任者與共圖之禮部侍郎史彌遠素與侂冑有隙遂欣然奉命開熙三年十一月三日侂冑方早朝彌遠密遣中軍統制夏震伏兵六部橋側率健卒擁侂冑至玉津園槌殺之赴延和殿以聞后既誅侂冑彌遠日益貴用事嘉定十四年帝以

國嗣未定養宗室子貴和立為皇子賜名竑彌遠專政
竑漸不能平彌遠懼陰蓄異志欲立他宗室子昀為皇
子遂陰與昀通十七年閏八月帝大漸彌遠夜召昀入
宮遣后兄子谷及石以廢立事白后后不可凡七往反
后終不聽谷等乃拜泣曰內外軍民皆已歸心苟不早
立禍變必生楊氏無噍類矣遂矯詔廢竑為濟王立昀
為皇子即帝位尊皇后曰皇太后同聽政加尊號壽明
紹定元年復加慈睿四年加尊號壽明仁福慈睿皇太

后五年十二月崩於慈明殿諡恭聖仁烈

理宗謝皇后諱道清天台人宰相深甫之孫父渠伯早卒初深甫為相有援立楊太后功太后德之帝即位議擇中宮太后命選謝氏諸女后就道時賈涉女有殊色同在選中及入宮帝意欲立賈太后曰謝女端重有福宜正中宮帝不能奪寶慶三年冊為皇后后既立賈貴妃專寵妃薨閣貴妃又以色進后處之裕如太后深賢之開慶初元兵渡江議遷都平江慶元后諫不可恐搖

動民心乃止帝崩度宗立尊為皇太后號壽和聖福度
宗崩帝熈即位尊為太皇太后垂簾同聽政太后以兵
興費繁痛自裁節汰慈元殿提舉已下官省汎索錢緡
月萬京朝官聞難往往避匿遁去太后命揭榜朝堂曰
我國家三百年待士大夫不薄吾與嗣君遭家多難爾
小大臣不能出一策以救時艱內則畔官離次外則委
印棄城亦何以見先帝於地下乎天命未改國法尚存
凡負國逃者御史覺察以聞德祐元年六月朔日食既

太后削聖福以應天變張世傑兵敗於焦山陳宜中棄官去太后遺書宜中母勉之還朝太后又親為書召夏貴等兵貴等亦罕有至者元兵破常州太后遣陸秀夫等請和不從宜中即率公卿請遷都太后不許明年正月更命宜中使軍中約用臣禮宜中難之太后涕泣曰苟存社稷臣非所較也未幾元兵薄皋亭山駐錢塘帝羃與金后北去太后以疾留杭是年八月至京師越七年崩

度宗全皇后會稽人理宗母慈憲夫人姪孫女也父昭孫知岳州帝為忠王時議納妃理宗以慈憲故乃詔后入宮問曰爾父昭孫昔在寶祐間沒於王事每念之令人可哀后對曰妾父可念淮湖之民尤可念也帝深異之語大臣曰全氏女言辭甚令宜配冢嫡以承祭祀景定二年冊為皇太子妃度宗立冊為皇后生帝焞十年度宗崩帝焞立冊為皇太后後入燕京為尼正智寺而終

楊淑妃初選入宮為美人咸淳三年進封淑妃生益王

昱昱即位於福州尊妃為太后

續通鑑作太妃

封弟昺衛王昺

修容俞氏所生也昱卒昺代立踰年投海死妃聞之大慟曰吾艱關忍死者正為趙氏一塊肉尚有可望爾今天命至此夫復何言遂赴海死其將張世傑葬之海濱

公主附

宣祖一女

秦國公主

按宋傳英宗以上諸女稱大長公主神宗哲宗女稱長公主徽宗女稱帝姬今依鄭志概

稱皇女唐書概稱公主例刪
歸一律帝姬則仍其舊云

太祖同母妹也初適米福

德福德卒太祖即位封燕國長公主再適忠武軍節度

使高懷德開寶六年十月薨諡恭懿真宗追封大長公

主元符三年改秦國政和三年

按徽宗紀政和三年改公主為帝姬本傳誤作

四年今改正

改公主為帝姬太祖以下諸女盡易之封恭懿

大長帝姬有娣一人未笄而夭建隆三年追封陳國長

公主元符末改封荆國大長公主政和中改封恭獻大

長帝姬

太祖六女

申國公主蚤薨

成國公主蚤薨

永國公主蚤薨

魏國公主開寶三年封昭慶公主下嫁左衛將軍

王承衍傳

作右衛將軍

王承衍太宗即位進封鄭國淳化元年改秦國

真宗至道三年進長公主大中祥符元年薨諡賢肅元
符末改封魏國大長公主

魯國公主開寶五年封延慶公主下嫁左衛將軍石保

吉

按石保吉傳保吉尚延慶公主在開寶四年

太宗即位進封許國淳化元

年改晉國真宗初進長公主大中祥符二年進大長公主薨諡賢靖元符末改封魯國

陳國公主開寶五年封永慶公主下嫁右衛將軍魏咸信太宗即位進封虢國淳化元年改齊國真宗初進許國長公主咸平二年薨諡貞惠後改恭惠景祐三年追封大長公主元符末改封陳國

太宗七女

滕國公主蚤薨

徐國公主太平興國九年封蔡國下嫁左衛將軍吳元

宸

按吳元宸傳太平興國八年選尚太宗第四女與本傳互異

淳化元年改魏國薨

諡英惠至道三年追封燕國長公主景祐三年進大長

公主元符末改徐國

邠國公主太平興國七年為尼號員明大師八年卒至

道三年追封曹國長公主景祐三年進大長公主元符

改邠國

楊國公主至道三年封宣慈長公主咸平五年進魯國

下嫁左衛將軍柴宗慶宗慶禹錫之孫帝命主以婦禮

謁禹錫第歷徙韓魏徐福四國仁宗立進鄧國大長公

主

按宗慶傳云累封楚國大長公主
本傳不載宜鄧國為楚國之訛歟

明道二年薨進封

晉國諡和靖元符末封楊國公主性妬宗慶無子以兄

子為後

雍國公主至道三年封賢懿長公主咸平六年下嫁右

衛將軍王貽永進封鄭國景德元年薨諡懿順景祐三年追封大長公主皇祐三年改韓國徽宗改封雍國衛國公主至道三年封壽昌長公主大中祥符二年進封陳國改吳國號報慈正覺大師改楚國又改邠國天禧二年改建國乾興元年封申國大長公主天聖二年薨諡慈明徽宗改衛國

荆國公主幼不好弄未嘗出房闥太宗嘗發寶藏令諸女擇取之欲以觀其志主獨無所取真宗即位封萬壽

長公主改隨國下嫁駙馬都尉李遵勗舊制尚者降其父為兄弟行時遵勗父繼昌生日主以舅禮謁之遵勗賓客皆一時賢士每燕集主必親視饗餼歷封越宿鄂冀四國明道元年進魏國遵勗出守許州暴得疾主亟欲馳視之左右曰須奏得報乃可行主不待報而往其後居夫喪哀麻未嘗去身服除不復御華麗嘗燕禁中帝親為簪花辭曰誓不復為此久矣主善筆札喜圖史尤善女工嘗誡諸子以忠義自守無恃吾以速悔尤視

他子與已出均及病目帝挾醫診視親舐其目曰先帝
伯仲之籍十有四人今獨存大主疾倘可移於朕亦所
不避也主雖喪明平居隱几沖淡自若誠諸子曰汝父
遺令樞中無藏金玉吾歿後當亦如是皇祐三年薨追
封齊國大長公主諡獻穆徽宗改封荆國

真宗二女

惠國公主蚤薨

昇國公主初入道明道二年封衛國長公主號清虛靈

照大師慶厯七年追封魯國諡昭懷徽宗改封昇國大
長公主

仁宗十三女

周陳國公主帝長女也寶元二年封福康嘉祐二年進

封充國

按李燾長編載嘉祐二年進封充國公主
為主性為福康公主則是先封充國也與本傳異

純孝帝嘗不豫主侍左右徒跣籲天乞以身代帝隆慶
之帝念章懿太后不及享天下養故擇其兄子李瑋使
尚主瑋朴陋與主積不相能主中夜扣皇城門入訴瑋

皇懼自劾後數年不復協詔出瑋於外主降封沂屏居
內廷久之復召瑋為駙馬都尉如初英宗立進越國長
公主神宗治平四年進楚國大長公主熙寧三年薨輔
臣議諡帝以主事仁祖孝命曰莊孝追封秦國徽宗加
周陳國政和間改諡莊孝明懿大長帝姬

徐國公主蚤薨

鄧國公主蚤薨

鄭國公主蚤薨

楚國公主蚤薨

商國公主蚤薨

魯國公主蚤薨

唐國公主蚤薨

陳國公主蚤薨

豫國公主蚤薨

按文獻通考載仁宗十三女周國漢國秦國魏國魯國吳國燕國楚國八公主

俱蚤夭封國人
數皆與史不合

秦魯國賢穆明懿公主母周貴妃嘉祐五年封慶壽進

惠國治平四年進魯國大長公主下嫁吳越忠懿王曾
孫右領軍衛大將軍錢景臻改韓周燕國徽宗朝進秦
魏兩國政和三年更封令德景行大長帝姬靖康二年
諸帝姬北徙姬以先朝女金人不知留於汴建炎初復
公主號改封秦魯國紹興三年請入見因留居焉帝以
公主行尊年高甚敬之每內見必先揖靖康中戚里例
納節至是公主為其子忱請還舊官帝以忱為瀘州節
度使久之又為忱請優賜推恩加忱開府儀同三司時

主有三子恤愷非已出故獨厚於忱帝戒之曰長主壽考如此乃仁宗皇帝深仁厚澤所鍾長主待遇諸子宜法仁宗用心之均一主感服薨諡賢穆後加諡明懿

宛國公主嘉祐六年封永壽進榮國長公主治平四年進祁國大長公主熙寧九年改魯國下嫁左領軍衛大將軍曹詩主性儉節於池臺苑囿一無所增飾十年夏旱曹族以主生日將盛具為壽主曰上方損膳徹樂吾何心能安悉屏之元豐六年薨追封荆國諡賢懿徽宗

追封兗國又改賢懿恭穆大長帝姬

燕舒國公主嘉祐六年封寶壽

按文獻通考不載燕舒國公主且云慶壽寶壽

二公主史不言其所適今據慶壽即前秦魯國公主寶壽即燕舒國公主也通考所紀恐誤

八年進

封順國長公主治平四年追冀國大長公主元豐五年

改魏國下嫁開州團練使郭獻卿八年進楚國徽宗改

吳國進吳越國改兗秦國政和二年薨追封燕舒國諡

懿穆

英宗四女

舒國公主蚤薨

魏楚國公主嘉祐八年封德寧治平三年進封徐國下
嫁左衛將軍王師約四年進陳國長公主元豐八年薨
追封燕國大長公主諡惠和元祐四年追封秦國徽宗
追封魏國加韓魏國改魏楚國

魏國公主母宣仁聖烈皇后嘉祐八年封寶安公主神
宗立進舒國長公主改蜀國下嫁左衛將軍王詵詵母
盧寡居主處之近舍日致膳羞盧病自和湯劑以進以

不得日侍宣仁於寶慈宮居常悒然間遇旱暵帝降損
以禱主亦如之曰我奉賜皆出公上固應同其休戚帝
居慈聖光獻皇后喪毀甚主曰吾與上同體視此亦復
何聊立散遣歌舞三十輩元豐三年病篤主性不妬忌
王詵以是自恣嘗貶官至是帝命還詵官以慰主意薨
追封越國諡賢惠後進封大長公主累改秦荆魏三國
韓魏國公主與魏國同生始封壽康公主改祁國魏國
下嫁張敦禮進冀國大長公主改秦越楚國加今封政

和三年改賢德懿行帝姬宣和五年薨

神宗十女

楚國

文獻通考
作吳國

公主蚤薨

鄆國公主蚤薨

潞國公主蚤薨

邢國公主蚤薨

邠國公主蚤薨

兗國公主蚤薨

欽定四庫全書

欽定續通志

卷七十七

二十一

周國公主

文獻通考作周國淑懷公主

母欽聖憲肅皇后封延禧公

主生而警悟自羈卹宛如成人年十二卒追贈燕國元

符末改封周國

唐國公主

文獻通考作唐國賢穆公主

始封淑壽公主初帝念韓琦

功德欲以為婚姻故哲宗緣先帝意以主降琦之子嘉

彥歷封溫曹冀雍越燕六國

按韓琦傳嘉彥尚神宗女齊國公主本傳載歷封六

國而不及齊疑有脫誤

政和元年薨追封唐國長公主

潭國賢孝公主母宋貴妃始封康國紹聖四年下嫁王

遇歷韓魯陳鄆四國大觀二年薨追加封諡

徐國公主母欽成皇后始封慶國進益冀蜀徐四國年
及笄獨處聖瑞宮侍母疾晝夜不暫去藥餌非經手弗
以進迨疾革號慟屢絕左右不忍視崇寧三年下嫁鄭
王潘美曾孫意事姑修婦道潘故大族夫黨數千百人
賓接皆盡禮無裏外言服玩不為紛華歲時簡嬉遊膝
妾得女拊視如己出政和三年改稱柔惠帝姬五年薨
追封賢靜長帝姬

哲宗四女

鄧國公主蚤薨

楊國公主蚤薨

陳國公主始封德康公主進瀛國榮國大觀四年下嫁
石端禮徙陳國改淑和帝姬政和七年薨

秦國康懿公主始封康懿進嘉國慶國政和二年改韓

國公主出降潘正夫改淑慎帝姬靖康末與令德景行

原文作賢德懿行考前傳當
是令德景行之誤謹改正

大長公主俱以先朝女留

於汴建炎初復公主號改封吳國避地至婺州紹興四年入見奏言祖宗以來駙馬都尉皆除使相今正夫歷事四朝在汴京曾建議迎陛下至杭州又言禁衛未集預宜防變乞除開府不許八年再入見又為正夫求恩數帝曰官爵豈可私與人況今日多事未暇及此時趙鼎當國頗抑正夫鼎去位正夫始得開府之命十九年又入朝子長卿粹卿端卿皆自團練使陞觀察使從所請也孝宗即位進封秦國大長公主隆興二年薨諡康

懿

徽宗三十四女

嘉德帝姬建中靖國元年封德慶公主改封嘉福再封

嘉德下嫁左衛將軍曹寅

榮德帝姬初封永慶公主改封榮福再封榮德下嫁左

衛將軍曹晟從帝北還至燕京晟卒改適習古國王

順淑帝姬初封順慶公主薨追諡益國追封順淑

安德帝姬初封淑慶公主改封安福再封安德下嫁左

衛將軍宋邦光

茂德帝姬初封延慶公主改封康福再進茂德下嫁宣
和殿侍制蔡絳

壽淑帝姬初封壽慶公主薨追封豫國復封壽淑

惠淑帝姬初封惠慶公主薨追封鄧國復封惠淑

安淑帝姬初封安慶公主改封隆福薨追封蜀國復封
安淑

崇德帝姬初封和慶公主改封崇福下嫁左衛將軍曹

湜再封崇德宣和二年薨

康淑帝姬初封康慶公主改封承福薨追封商國復封
康淑

榮淑帝姬初封崇慶公主改封懿福薨追封蔡國復封
榮淑

保淑帝姬初封保慶公主薨追封魯國復封保淑

成德帝姬初封昌福公主再封成德下嫁向子房

洵德帝姬初封衍國公主尋改封洵德下嫁田丞

悼穆帝姬初封徽福公主薨追封悼穆

顯德帝姬初封顯福公主尋改封顯德下嫁劉文彥

熙淑帝姬初封熙福公主薨追封華國復封熙淑

敦淑帝姬初封壽福公主薨追封涇國復封敦淑

順德帝姬初封順福公主尋改封順德下嫁向子宸

柔福帝姬初封柔福公主北遷五國城適徐還而薨紹

興間追封和國長公主

中福帝姬薨追封冲慧

寧福帝姬政和四年封

保福帝姬追封莊懿

賢福帝姬追封沖懿

仁福帝姬追封順穆

和福帝姬

永福帝姬

惠福帝姬

令福帝姬

華福帝姬

慶福帝姬

儀福帝姬

純福帝姬

恭福帝姬靖康之變帝姬生纔周晬留於汴建炎三年

薨封隋國公主

孝宗二女

嘉國公主紹興二十四年封碩人進永嘉郡主蚤薨乾

道三年追封次女生五月而夭未及封

光宗三女

文定公主蚤薨

和政公主蚤薨

齊安公主蚤薨

寧宗一女

祁國公主生六月而夭追封祁國

理宗一女

周漢國公主母賈貴妃蚤薨帝無子公主生而甚鍾愛
初封瑞國公主改昇國景定二年帝以楊太后擁立功
乃選太后姪孫鎮尚主進封周國帝欲時時見之乃為
主起第嘉會門飛樓閣道密邇宮苑帝常御小輦從宮
人過公主第薨謚端孝

欽定續通志卷七十七